

## *Erindisbréf dreifbýlisnefndar*

### *Sveitarfélagsins Ölfuss*

#### **I. kafli**

#### **Umboð, skipan og hlutverk**

##### **1. gr.**

Dreifbýlisnefnd Sveitarfélagsins Ölfuss er skipuð af bæjarstjórn Ölfuss og fer hún í umboði bæjarstjórnar með málefni dreifbýlis í sveitarfélaginu sem henni er falið eins og nánar er kveðið á um í erindisbréfi þessu.

##### **2. gr.**

Dreifbýlisnefnd er skipuð þremur fulltrúum og jafn mörgum til vara. Kjörtímabil fulltrúa miðast við kosningar til sveitarstjórnar. Í upphafi kjörtímabils kýs bæjarstjórn formann og varaformann. Þjónustufulltrúi dreifbýlis og bæjarstjóri eiga rétt á að sitja fundi nefndarinnar með málfrelsi og tillögurétt.

##### **3. gr.**

Dreifbýlisnefnd hefur faglega umsjón með málefnum dreifbýlis í sveitarfélaginu.

Hlutverk og verkefni nefndarinnar eru m.a.:

- að vera bæjarstjórn til ráðgjafar í málefnum dreifbýlisins,
- að vera málsvari íbúa í dreifbýli gagnvart bæjarstjórn og veita umsagnir um málefni dreifbýlisins, að hafa heimild til að vísa málum á dagskrá bæjarstjórnarfundar,
- að gera tillögur til bæjarstjórnar að skipulagi snjómoksturs í dreifbýlinu,
- veita bæjarstjórn umsögn um fyrirkomulag á akstursþjónustu íbúa, s.s. skólaakstri,
- að fá til umsagnar tillögur um breytingar á aðalskipulagi sveitarfélagsins,
- að veita álit á landnýtingu í sveitarfélaginu,
- að veita umsagnir samkvæmt 13., 15. og 17. gr. jarðalaga nr. 81/2004, varðandi landskipti, sameiningu jarða og umsókn um lögbylisrétt,
- að hafa umsjón með eyðingu minka og refa í sveitarfélaginu,
- að fjalla um legu reiðstíga og gera tillögu að forgangsröðun þeirra,
- að fjalla um tillögur að fjárhagsáætlun hvers árs hvað varðar þá liði sem falla undir verksvið nefndarinnar,
- að vinna önnur þau verkefni sem bæjarstjórn felur nefndinni og falla að starfssviði hennar.

##### **4. gr.**

Ákvarðanir nefndarinnar taka formlega gildi við staðfestingu bæjarstjórnar.

#### **II. kafli**

#### **Starfsmenn, fundir og starfshættir**

##### **5. gr.**

Dreifbýlisnefnd kemur saman fyrir luktum dýrum á fastákveðnum fundartíma. Skal nefndin gera samþykkt um fundartíma á sínum fyrsta fundi. Þjónustufulltrúi dreifbýlis er starfsmaður nefndarinnar. Hann ber ábyrgð á að samþykktum og ákvörðunum hennar sé hrint í framkvæmd, eftir því sem fjárhagsáætlun og aðrar ákvarðanir bæjarstjórnar kveða á um, og undirbýr og situr fundi nefndarinnar.

#### **6. gr.**

Formaður boðar fundi í samráði við starfsmann nefndarinnar. Nefndin heldur fundi að lágmarki ársfjórðungslega. Skylt er að boða til fundar ef meirihluti aðalmanna í nefndinni æskir þess.

#### **7. gr.**

Til fundar telst löglega boðað hafi allir nefndarmenn eða varamenn í forföllum aðalmanna svo og aðrir sem seturétt eiga á fundinum verið boðaðir með a.m.k. tveggja sólarhringa fyrirvara og þeim jafnframt greint frá dagskrá fundarins. Að jafnaði skal boðað til funda með rafrænu fundarboði og því skal fylgja afrit þeirra erinda sem til umfjöllunar eru. Komi upp mál sem krefst skjótrar úrlausnar nefndarinnar getur fyrirvari um fundarboðun verið skemmri.

#### **8. gr.**

Formaður nefndarinnar stýrir fundi samkvæmt ákvæðum samþykktar um stjórn Sveitarfélagsins Ölfuss. Dreifbýlisnefnd getur enga samþykkt eða ályktun gert nema meirihluti hennar sitji fund. Tillaga fellur á jöfnum atkvæðum. Nefndarmaður hefur ekki atkvæðisrétt um mál sem varða hann sjálfan eða náði skyldmenni hans og skal hann í slíkum tilvikum víkja af fundi. Um hæfi nefndarmanna og starfsmanna nefndarinnar vísast til 17.gr. samþykktar um stjórn Sveitarfélagsins Ölfuss og 20. gr. sveitarstjórnarlaga nr. 138/2011. Fundarmenn eru bundnir þagnarskyldu vegna mála, sem þeir fá vitneskju um í starfi sínu fyrir nefndina og ætla má að leynt eigi að fara samkvæmt eðli máls eða lögum, hvort sem þau varða einka- eða almannahagsmuni. Þagnarskylda helst þó látið sé af störfum.

#### **9. gr.**

Rita skal fundargerðir nefndarinnar með rafrænum hætti sbr. samþykkt um stjórn Sveitarfélagsins Ölfuss. Í fundargerð skal skrá hvar og hvenær fundir eru haldnir og hvenær þeim er slitið. Allar tillögur sem fram eru bornar skulu skráðar svo og samþykktir og ályktanir nefndarinnar, ásamt rökstuðningi og skulu allir viðstaddir undirrita fundargerðina. Fundargerðir, afrit af skýrslum, sendibréfum og skjölum nefndarinnar, lög, reglugerðir er varða nefndina svo og erindisbréf skulu vera tiltæk á öruggum stað á bæjarskrifstofu sveitarfélagsins. Starfsmaður nefndarinnar skal sjá um að afrit af fundargerðum séu send fundarmönnum.

#### **10. gr.**

Nefndarmanni er skylt að sækja fundi nema lögmæt forföll hamli. Hann skal boða staðgengil sinn og láta formann vita um forföll með góðum fyrirvara. Hver nefndarmaður á rétt á að koma máli á dagskrá fundar enda skili hann efni þess til formanns og/eða starfsmanns að minnsta kosti þremur sólarhringum fyrir fund. Nefndarmenn skulu hafa hag sveitarfélagsins að leiðarljósi við störf sín en eru ekki bundnir af öðru en sannfæringu sinni, lögum og samþykktum um stjórn Sveitarfélagsins Ölfuss í atkvæðagreiðslu um málefni á vegum nefndarinnar.

### **III. kafli**

#### **Gildistaka**

#### **11. gr.**

Erindisbréf þetta byggist á ákvæðum sveitarstjórnarlaga nr. 138/2011 um verkefni sveitarfélaga og starfsemi nefnda og ráða á þeirra vegum, stjórnsýslulögum nr. 37/1993 og samþykkt um stjórn Sveitarfélagsins Ölfuss.

Samþykkt í bæjarstjórn Sveitarfélagsins Ölfuss 5.október 2023